

ԱՌԱՋԱԲԱՆ

«ՈՒՂԵՑՈՒՅՑ ԲԱՐԵՊԱՇՏ ԿՅԱՆՔԻ» ԳՈՐԾԻ

Հայաստանյայց մեր Մայր Եկեղեցին, Ե դարից ի վեր կատարյալ անկախություն ձեռք բերելով հանդերձ, երբեք իրեն և իր ժողովրդին չի դատապարտել մեկուսացման կամ ինքնափակման, այլ երկար ու ձիգ դարերի ընթացքում շարունակել է շփման մեջ մնալ քրիստոնյա մյուս Եկեղեցիների հետ և յուրացնել այն լավն ու օգտակարը, որ կարող էր հաջող կերպով պատվաստվել մայր ծառի վրա՝ նոր համ ու հոտ հաղորդելով մեր ինքնատիպ ժառանգությանը:

Այդպես է, որ երբեք չեն դադարել թարգմանական աշխատանքները, և զանազան քրիստոնյա (և ոչ միայն քրիստոնյա) արևմտյան ու արևելյան հեղինակներ թարգմանաբար ներկայացել են հայ հավատացյալին՝ միմիայն հոգևոր օգուտ և դաս տալով նրան:

Այսօր էլ այդ թարգմանական աշխատանքը կանգ չի առել: Այսօր էլ եկեղեցական մամուլի էջերում շարունակվում են թարգմանաբար ներկայանալ հին ու նոր հեղինակներ, որոնց ստեղծագործական գոհարները համաշխարհային քրիստոնեական գրականությանն են պատկանում, ուստիև ուղղակի անհնարին է հայ քրիստոնյա մարդուն հաղորդակից չդարձնել այդ հոգևոր արժեքներին:

Այդ սկզբունքով և մղումով է թարգմանված նաև Ֆրանցիսկոս դը Սալի «Ուղեցույց բարեպաշտ կյանքի» գործը, որը հոգևոր դաստիարակության մի սքանչելի գոհար է, որով բարեպաշտ ապրելու արվեստն է սովորել արդեն քանի սերունդ:

Ֆրանցիսկոս դը Սալի անունը վաղուց անտի հայտնի է իր երկրի սահմաններից դուրս: Իր երկերը թարգմանվել են աշխարհի բազմաթիվ լեզուներով: Ռուսերեն թարգմանությամբ այն հայտնի է նաև հայ ընթերցողներից ոմանց, սակայն հայերեն թարգմանությամբ կաթոլիկ Եկեղեցու այս մեծ սուրբը դառնում է հայախոս և հայաբարբառ:

Ֆրանցիսկոս դը Սալը (1567-1622) եղել է Ժնևի եպիսկոպոսը (1602-ից) և իր գրչի զորությամբ դարձել կաթոլիկ Եկեղեցու առաջնորդող պաշտպաններից մեկը՝ ընդդեմ կալվինականության հարձակման: Փայլուն ապագա խոստացող աշխարհիկ ծառայությունը թողնելով, Ֆրանցիսկոսը 26 տարեկան հասակում ձեռնադրվեց քահանա և իր ամբողջ կյանքը նվիրեց Եկեղեցու ամբողջականության և միության ջատագովությանը և, անգամ արհամարհելով իր կյանքի դեմ եղած

սպառնալիքները, եռանդուն քարոզչություն ծավալեց բողոքական-կալվինականների շրջանում՝ զգալի հաջողությամբ:

Իր ամենահայտնի գործերն են՝ «Ուղեցույց բարեպաշտ կյանքի» և «Աստուծո սիրո մասին», որոնք անհատական կյանքի քրիստոնեավայել կազմակերպման հոյակապ դասագրքեր են:

Ֆրանցիսկոս դը Սալի գործերի հիմնական արժեքն այն է, որ այն հեռու է դավանաբանական վիճահարույց կետերի նույնիսկ աննշան արժարժումից և ըստ այդմ հավասարապես ուսանելի է ցանկացած դավանանքի տեր քրիստոնյայի համար: Այնուամենայնիվ, հեղինակի տողերում զգացվում է խորին համոզումը վավերական և առաքելական Եկեղեցու միությունից և ամբողջականությունից վերաբերյալ, որ նույնքան օրինակելի է մեզ համար:

Կարծում ենք, որ այս գործը օգտաշատ կլինի բոլոր նրանց համար, ովքեր ցանկանում են «ընտրել Տիրոջ ճշմարտությունից ճանապարհներն... ու ընթանալ Տիրոջ պատվիրանների ճանապարհով» (Սաղմ. ՃԺԸ 30, 32):

Մ. Ծ. Վ. Ա.